

TAITAS **Kipihac wê Pol kivuu vô** **Taitas ge**

¹ A, Pol, a ga Anutu nu yuac ti, di Yesu Kilisi nu sinale a. Anutu vông a la vô xomxo wê i vînoo he ên nêb he i tu i nue ge ên nêb a la ngîdu he xôn ên he i vông i vin xêkizêc, di he i xovô Anutu kiyang nôn wê ob didii he mi la vac môp wê Anutu vông ge, ² di he i xovô bê he obêc dô maviha luta lêc luta. Ilage wê Anutu gên o tung lag yuu kibun lêm ge od hilu kiyang pyap ên nêbê il obêc dô madviha luta lêc luta. Di Anutu o tiyi wê ob kityoo il ge lêm. ³ Om buc wê Anutu nêl ge wê vông xomxo la nêl kiyang tige yêp seac. Anutu wê vô il vêl ên il nêd nipaên ge nêl ên nêb a êno kô yuac xolac nêlên tige.

⁴ Taitas, a kivuu kipihac tiga vô ông. Ông ge a nug wê u xôn vông i vin ge. Mag Anutu yuu nu tuc Yesu Kilisi wê vô il vêl ên il nêd nipaên ge, yuu i vông vizid nivîha hixôn kiyang malehe i ngîdu ông xôn.

⁵ A sea ông vac vigwe Klit ên a nêbê ông dô vac Klit di vông yuac wê a vông ge myahîpu i yêp nivîha, di ông vînoo he wê ob kô yuac gyovîxa vac vigwe toto i tiyi wê a nêl vô ông ilage. ⁶ Om ông yaxên he di vînoo he wê nipaên ti o yêp vô he lêm, di wê vîné tîbed, di wê nue vông i vin Yesu om xomxo ti o tiyi wê ob nêl bê xomxo tige nue mi vông môp nipîpaa me vô nînya kitu vô

tae mae ge lêm. ⁷ Ên he gyovixa wê ob viac Anutu yuac, om he i timu vô môm nivîha ên xomxo i o léc tulec he nê nipaên ti lêm, di he i o léc kô he lec vô xomxo lêm, di he xêyaa i o léc vô myavinê lutibed lêm, di he i o léc num mi vô mavmav lêm, di he i o léc hi xomxo vaxvax lêm, di he i o léc doma vô mone i luu vêl lêm. ⁸ Nge, he i kô tibii mi loc viac he vac xumac di vev ngwax vô he, di he xêyaa i vin lec môm nivîha vihati, di he i viac he piyôp i yêp nivîha, di he i dô i tiyi xocbê xomxo wê viac i nivîha ge, di he i timu vô môm wê Anutu vông ge vihati, di he i viac he nivîha ên môm vihati wê he xovô ên nêb ob vông ge, ⁹ di he i hôm Anutu kiyang nôn wê xomxo tixuu he ya ge xôn pilihi, ên he obêc hôm xôn pilihi ge od he tiyi wê he ob nêl xolac nôn vô tibii di hi he wê yax xolac vun ge nê n kiyang i tô.

¹⁰ Ên xomxo tibeac vac vigwe Klit vô ninya kitu vô Anutu kiyang, di nêl kiyang vaxvax wê vông xomxo piyôp vô himena himena ge. He wê mi timu vô Yuda vông môm ninivi gôlên gee, he tibeac mi nêl kiyang tibêgee. ¹¹ He nêb he ob kô mone yuu susu vô xomxo, om he tixuu he ya môm nipaên wê o tiyi wê il ob vông ge lêm. Om kiyang wê he nêl ge vông xomxo hixôn he tae mae lie vô nipaên. Mêgem ông le vac he xôn ên he i o nêl kiyang nipaên tibêge lêm. ¹² Ilage Klit levac ti nêl lec lie Klit bêga ên nêbê, “He Klit ge xomxo vigwe kityooên, di he tiyi xocbê bwoc vîmen ge, di he mi ya levac, di mi dô ni maên.” ¹³ Kiyang tige vixôhilôg nôn. Om ông nêl he Klit nê nipaên vô he ya kiyang xêkizêc ên vông vinên wê he vông ge i yêp bôbac, ¹⁴ di

he i o ngô pivulac pileva wê xomxo Yuda mi nêl ge lêm, di he i o ngô kiyang baba wê xomxo wê vô nimi vô Anutu kiyang nôn ob nêl ge lêm.

¹⁵ Xomxo wê nilô paha ge ob yê susu vihati nêb nivîha. Lêc xomxo wê nilô ningeac wê o vông i vin Kîlisi lêm ge, he ob yê susu ti nivîha lêm, ên piyôp yuu nilô vô ningeac tiyima. ¹⁶ He mya mi nêl bêga en nêbê, “A xovô Anutu.” Lêc môm wê he vông ge nêl he kitong nêbê he mi yax Anutu vun. He mi vô nînya kitu vô Anutu kiyang, di he o tiyi wê he ob vông yuac nivîha ti ge lêm. Om Anutu yê he nîpaên.

2

Kiyang lec kipwoc

¹ Taitas, ông lêc tixuu xomxo ya môm nivîha i tiyi xocbê Anutu kiyang nôn nêl ge. ² Om ông nêl vô he kipwoc bêga bê he i o léc num mi vô mavmav lêm. Nge, he i timu vô môm nivîha tiyi wê ob vông xomxo yê he nivîha ge, di he i viac he piyôp i yêp nivîha, di he i vông i vin xêkizêc ta, di he xêyaa i vin lec xomxo, di he i le xêkizêc vac viyin vihati wê ob val vô he ge.

Kiyang lec vêxta yuu vêxwo

³ Ông nêl vô he vêxta bêga bê he i timu vô môm i tiyi xocbê xomxo vông vinên vông ge, di he i o léc nêl kiyang nîpaên lec xomxo lêm, di he i o num mia xêkizêc di mia i viac he lêm. Nge, he i tixuu he vêxwo ya môm nivîha, ⁴ ên he vêxwo gee i xovô mi timu vô môm nivîha bêga bê he xêyaa i vin lec liyae nue, ⁵ di he i viac he piyôp i yêp nivîha, di he i o loc vô vux bangwe di vông môm

nipaên lêm, di he i viac he xumac i nivîha, di he i ngidu xomxo xôn, di he i loc vac liyae kiyang kwa ngibi. He i timu vô môp tibêgee vîhati ên xomxo ti i o nêl nipaên lec Anutu xolac lêm.

Kiyang lec ngivîhi

⁶ Ông nêl vô he ngivîhi bêga bê he i viac he piyôp i yêp nivîha. ⁷ Taitas, ôcông va ge ông timu vô môp nivîha ên he ngivîhi he i yê di timu vô ông vixam. Di wê ông obêc tixuu he ya kiyang ge, od le i lêc nêl kiyang kityooên hixôn lêm. Nge, ông vông piyôp i loc vô môp nivîha di vông ông yuac tige. ⁸ Ông nêl kiyang nôn wê xovôên nivîha ge ên xomxo ti i o lêc tulec nipaên ti i yêp vac lêm. Om xomxo obêc nêb vông vevac vô ông ya kiyang ge od he ni ob yoc ên he, ên he o tiyi wê ob nêl kiyang nipaên lec il ge lêm.

Kiyang lec xomxo wê tu xomxo levac nue yuac

⁹ Ông nêl vô he wê tu xomxo levac nue yuac ge bêga bê he i loc vac xomxo levac wê viac he ge kwa ngibi, di vông he yuac vîhati i nivîha i tiyi wê xomxo levac ob yê nivîha ge. Di he i o luu kiyang vô xomxo levac ya kiyang nipaên lêm. ¹⁰ He i o lêc vun xomxo levac susu lêm. Nge, he i vông he yuac vîhati i yêp nivîha ên xomxo levac i yê bê he o vông yuac ti vô nipaên lêm. Ên nue yuac obêc vông bêge ge od xomxo ob yê xolac wê il mi nêl vô he ge nêb nivîha. Xolac tîga, Anutu wê vô il vêl ên il nêd nipaên ge kiyang nôn.

¹¹ Ên môp wê Anutu xo vîgwe pisiv ên il ge lam yêp seac pyap. Môp tige tiyi wê ob vô xomxo vîhati vêl ên he nêl nipaên, ¹² di ob tixuu il ya

môp nivihā bêga nêbê il ob sea môp wê il vô nimid vô Anutu ge, di sea môp nipaên kibun ga, di kol il ên môp nipaên, di vông môp wê bôbac ge, di timu vô môp wê Anutu vông ge vihati i tiyi buc vihati wê il dô kibun ga ge. ¹³ Il ob bin nôn nivihā ti wê ob vông il xêdyaa vô nivihā ge. Nôn tige bêga nêbê il Mag Anutu wê levac ge hixôn Yesu Kîlisi wê vô il vêl ên il nêd nipaên ge obêc vena hixôn xêseac wê i vông ge di lam le seac vô il. ¹⁴ Kîlisi lam yib ên il ên nêb ob vô il vêl ên nipaên vihati yang di vông il vô paha lec, ên nêb il tu i nue wê xo vînuv ên nêb il vông yuac nivihā ge.

¹⁵ Om ông nêl kiyang tige vô xomxo vihati, di tipî vô he piyôp ên he i timu vô kiyang tige, di nêl he nên nipaên kitong vô he. Le i lêc vông xomxo ti i yê ông i tiyi xocbê xomxo vidaaên ge lêm.

3

Môp nivihā wê il ob timu vô ge

¹ Taitas, ông nêl vô tibii Klit bêga bê he i loc vac gavman hixôn xomxo levac vihati kwa ngibi, di ngô he vya, di he i viac he i tiyi wê he ob vông yuac nivihā vihati ge, ² di he i o nêl kiyang nipaên lec xomxo ti lêm, di he i o ngaênma lêm. Nge, he i lum nêl kiyang vô xomxo, di he i vông nivihā vô he vihati.

³ Ên ilage il piyôp maên êno, di il vô ninyad kitu vô kiyang, di Seten didii il mi la vac môp nipaên, di il nilôd kidu il ên môp viyang viyang wê il xovô ên il nêb il ob vông ge, hixôn môp wê

il nidnivi yê nivîha ge, om môp nipaên tibêgee viac il ilage, di il nilôd xo nipaên lec xomxo, di il do mad vô susu wê xomxo vông ge. Xomxo yê il nipaên, di il xê he nipaên. ⁴ Il mi vông môp tibêgee ilage. Mêlêc Anutu wê vô il vêl ên il nêd nipaên ge xêyaa vin lec il di vông nivîha vô il. Om buc wê xêyaa vin lecên yuu nivîha wê i vông ge lam yêp seac vô il madnôn, ⁵ ge wê i vô il vêl ên il nêd nipaên. Lêc Anutu o vô il vêl ên il nêd nipaên ên yuac nivîha ti wê il vông ge lêm. Nge, Anutu vaci xo vigwe pisiv ên il, om lipac il vô paha lec di il tu i nue paha, di Myakilôhông Ngibua vông il dô madvîha. ⁶ Yesu vô il vêl ên il nêd nipaên, om Anutu kipyax Myakilôhông Ngibua lam vô il luu vêl lec yuac wê Yesu Kîlisi vông ge ⁷ ên nêb môp wê i xo vigwe pisiv ên il ge i vông il tu xomxo wê Anutu ob yê nivîha ge di vông il tu i nue di il dô bin buc wê il ob dô madvîha luta lêc luta ge.

⁸ Kiyang tige vixôhilông nôn. Om a nêl vô ông bêga bê ông nêl kiyang tige xêkizêc vô xomxo, ên he wê vông i vin Anutu ge he i vông nilô i loc vô yuac nivîha vihati di le xêkizêc vac yuac tige. Yuac tige nivîha di ob ngidu xomxo xôn.

⁹ Ông lêc le teva ên kiyang vaxvax wê xomxo kunacma lec ge, di kiyang wê he nêl lec bue tivae lê ge, di kiyang higacên, di kiyang wê he ngaênma lec Moses xolac ge. Ông le teva ên kiyang tibêgee, ên ob ngidu il xôn lêm di ob vô nôn nivîha vô il lêm.

¹⁰ Xomxo ti obêc lam nêl kiyang ti wê ob vông xomxo vông vinên hibû sea mi la le kidu kidu ge od ông nêl i nêd nipaên vô i manôn lu ti me lu

yuu. Lêc ngôên obêc ma ge od ông vô nimim vô i, ¹¹ ên ông xovô ên ông nêbê xomxo tibêge sea môt nivîha dĩ la vô môt nipaên, om nipaên wê ici va vông ge vông i vô nipaên dĩ kitya i vêl.

Kiyang viwen timuên

¹² A nêb a obêc vông Atemas me Tikikas i loc vô ông vô buc timuên. Om buc wê yuu ngwe obêc val vô ông ge od ông sea vigwe Klit dĩ seb lam vô a lutibed vac vigwe Nikopolis, ên a nêl pyap ên a nêb a ob dô vac Nikopolis tiyi dentuc wê lun yuu ningigooên ge. ¹³ Xomxo ti lê nêbê Sinas ge wê i xovô môt wê gavman vông ge vihati. Ông vông Sinas yuu Apolos i loc lutibed, dĩ ông ngĩdu yuu xôn êdêc susu ti i o lêc ma ên yuu vac môt lêm.

¹⁴ A nêl vô il lige vông vinên vihati bêga bê he i le xêkizêc vac yuac vihati wê nivîha ge ên i ngĩdu he xôn i tiyi buc vihati dĩ i ngĩdu xomxo wê susu maên ge xôn êno. Om he i vông yuac nivîha wê ob vô nôn nivîha ge, dĩ he i o dô vidaaên lêm.

¹⁵ Xomxo vihati wê dô hixôn a ge nêl vidiiên vô ông. Ông nêl vidiiên vô il lige vông vinên wê xêyaa vin lec il ge.

Vizid nivîha wê Anutu vông ge i viac xam vihati.

Yesu Xolac
The New Testament in the Patep Language of Papua
New Guinea
Nupela Testamen long tokples Patep long Niugini
copyright © 1986 Wycliffe Bible Translators, Inc.

Language: Patep

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-09-14

PDF generated using Haiola and XeLaTeX on 4 Mar 2023 from source files dated 9 Oct 2020

3d2c844d-4bc8-590b-bbf2-3a5fcd1f7ad8